

EDITORIAL

Isalikway ang mini nga kalinaw, magpursige sa dalan sa gubat sa katawhan

Siguradong ipanghinambog ni Marcos sa iyang ika-upat nga State of the Nation Address ang programa sa "kalinaw ug kalamboan" nga ginapasiugdahan sa iyang rehimen. Iya kining gamiton nga okasyon para palakpakan ang iyang mga pasistang gaway ug alipures sa "pagpakgang sa armadong panagbangi." Dungan niini, iyang tabunan ang grabeng pagpangabuso sa gahum ug paglapas sa mga demokratikong katungod, sa kasyudaran ug ilabina sa kabanikanhan.

Mini ug haw-ang ang "kalinaw ug kalamboan" sa "National Action Plan for Unity, Peace and Development" ni Marcos. Usa kini ka malinglahong islogan aron tabunan ang kamatuoran sa kaylap nga kalisud, kagutom ug pag-antus sa milyon-milyong mag-uuma ug mamumuo ug mga walay panginabuhian. Laraw niining ipadawat sa katawhan nga kapalaran na nila ang mag-antus sa pagpangdaugdaug ug pagpahimulos aron idiskaril ang ilang diwa ug kusog nga manalipud ug mosukol, ug payukbuon sila sa gahum sa teroristang estado.

Sa takuban sa "kalinaw," ginagamit ni Marcos ang mga armadong pwersa sa estado sa pagpahamtang og balaod militar sa kabanikanhan aron sumpuon ang pagsukol sa masang mag-uuma. Tumong niining subaybayan ang matag lihok sa mga tagabaryo, kontrolon ang suplay sa pagkaon ug komersyo, bisan ang oras sa pagtrabaho sa umahan sa mga mag-uuma. Giobligang tanan nga magpa-"clear" sa ilang pang-

lan ug "makigtinabangay" sa mga upisyal militar. Walay hunong ang pagpanghasol sa iladong mga lider ug aktibo sa mga kahugpungan sa mag-uuma. Daghan ang mga kaso sa pagpatay, pagdakop ug iligal na pagpriso, tortyur ug mga masaker, pagpanganyon ug pagpanghulog og bomba duul sa mga komunidad.

Aron hadlukon ang tagabaryo, ginakampuhan sa mga panon sa mga sundalo ang mga baryo, ug ginagamit nga baraks ang mga eskwelahan o *barangay health center*. Gitugaw nila ang kahilum sa baryo pinaagi sa paghubog, sugal, paggamit sa ginadiling droga ug paturagas nga pagpabuto og pusil. Sa ngalan sa "depensa sa teritoryo," pugos nga ginarekrut sa mga sundalo ang mga mag-uuma sa paramilitar nga grupong CAFGU ug Barangay Intelligence Network aron gamiton sila batok sa ilang mga silingan.

Sa ngalan sa "pag-ases sa kapasidad" sa mga komunidad sa ka-



syudaran, ginagamit ni Marcos ang iyang mga armadong pwersa aron sumpuon ang katungod sa mga mamumuo, semi-proletaryo, kabatanonang estudyante ug uban pang sektor sa kasyudaran. Ginatiktikan ug ginahasi ang mga unyonista ug mga aktibista sa eskwelahan ug mga komunidad aron pahunungon sa ilang pag-organisa ug pagtabang sa ilang kapwa. Sama sa kabanikanhan, gigamit nga taktika ang

pagpamig-ot ug walay hunong nga pagpanghulga sa ilang mga pamilya aron pugson silang mosunod sa kung unsay gusto sa militar ug pulis.

Engrandeng pagpanglingla sa masang mag-uuma ang gipanghinambog ni Marcos nga "pag-apud-apud sa titulo" tungod kay kadaghanan niini kanhi na nilang gunit na kolektibong titulo (Certificate of Land Ownership Award) ilalum sa "agrarian reform communities," la-kip na ang mga yutang kanhi nang nahatag sa rebolusyonaryong kalihukan sa mga mag-uuma ug lumad, nga gibahin-bahin aron dali rang paliton o ilugon sa dagkung mangingilog ug yuta.

Lapad nga lupain ang ginastubasta ni Marcos sa mga langyawng dagkung kapitalista sa porma sa pagpa-"abang" og hangtud 99 ka tuig. Gatasan ka libong mag-uuma ug mga lumad ang ginapalayas aron hatagag dalan ang mga plantasyon, minahan, mga proyektong pang-enerhiya, turismo ug uban pang operasyon sa dagkung kumpanyang langyaw ug lokal. Ginatanyagan sila ni Marcos nga mamuhunan nga wala o halos walay pagabayarang buhis. Siguradong mas bug-at pa nga mga anti-katawhan ug anti-nasyunal nga

palisiya ang imando ni President Trump sa US sa papet nga si Marcos sa panagtagbo nila sa White House.

Kaugalingon lamang ang ginailad nilang Marcos, sa iyang mga upisyal militar ug alipures sa NTF-Elcac sa pagpanghinambog nga hapit na nilang mapuo ang Bagong Hukbong Bayan. Usa na lang kuno ang natarang gerilya sa tibuok nasud, pero mayorya pa gihapon sa mga batalyong pangkombat AFP ang nakadeploy batok sa BHB.



Ginagamit ni Marcos ang pipila ka nagtraydor sa masa aron dayegon ang iyang "kalinaw ug kalambonan." Sila mga reaksyunaryong espesyal nga ahente para mangulihad og disimpormasyon ug bakak batok sa rebolusyonaryong kalihukan.

Ang "kalinaw" ni Marcos kahilum sa lubnganan sa mga biktima sa iyang pasistang paghari. Gisaulog sa imperyalismong US ug mga lokal nga nagharing hut-ong ang kalinaw nga gipanghinambog ni Marcos aron gawasnon nilang kawkawon ang yuta sa masang mag-uuma, gun-ubon ang mga bukid ug suba, sakmiton ang bahandi sa nasud, kurakuton ang nasudnong bahandi ug tukuron sa nasud ang gahum sa pwersang militar sa US.

Ang maong mini nga "kalinaw" ni Marcos ug sa iyang NTF-Elcac ug AFP usa ka dakung babag sa pakig-hisgot kalinaw sa NDFP. Babag usab ang padayon nga pagpamig-ot, pagpriso ug pagpatay sa mga konsultant ug representante sa NDFP, sukwahi sa kanhing mga kasabutan. Dili makab-ot ang makatarunganon, malingkawasnon ug malahutayong kalinaw hangtud dili atubangon ug sulbaron ang batayang problema nga maoy ugat sa armadong panagbangi sa nasud, ug kung ang bugtong tumong mao ang pukanon, sumpuon ug pasurenderon ang tanang nagasukol.

Kinahanglang isalikway sa katawhang Pilipino ang mini ug hawang nga kalinaw ni Marcos. Atubangan sa nagkagrabeng pagpanumpo, nagkagrabeng porma sa pagpangdaugdaug ug pagpahimulos, ug paggrave sa krisis sa dunot nga sistemang semikolonyal ug semipyudal, walay laing kapilian ang katawhang Pilipino kundili ang dalan sa pagsukol, ilabina ang dalan sa armadong pakigbisog. Ang armadong pakigbisog ang pinakakusog nga armas sa katawhan aron panalipdan ang ilang katungod, kinabuhi ug panginabuhian. Kung walay armadong pakigbisog ang katawhan, walay hunong nga magdomina ang imperyalismong US ug mga nagharing hut-ong sa pagpangdaugdaug ug pagpahimulos sa katawhan.

Taliwala sa nasinati nga mga kadaut tungod sa kaugalingong mga kahuyangan ug atubangan sa todong atake sa AFP, determinado ang Bagong Hukbong Bayan nga moangot sa dalan sa armadong pakigbisog, tul-iron ang kanhing mga kahuyangan ug pakusgon ang rebolusyonaryong pagsukol. Sa pagpangulo sa Partido, padayon nga molapad ug mokusog ang BHB ug bawenseng masa niini sa tibuok nasud. Nagpabiling tabunok ang yuta aron moas dang ang armadong pakigbisog ug subling pakusgon ang mga natarang gerilya aron magsilbing kota sa pakigbisog sa katawhan alang sa nasudnon ug katilingbangong paglingkawas.

 <p>Bolyum LVI Ihap 14 Hulyo 21, 2025</p> <hr/> <p>Ang Ang Bayan ginapagawas sa pinulongang Pilipino, Bisaya, Iloco, Hiligaynon, Waray ug Ingles. Nagadawat ang Ang Bayan og mga kontribusyon sa porma sa mga artikulo ug balita. Ginaawhag usab ang mga tigbasa nga magpadangat og mga puna ug rekomendasyon sa pagpalambo sa atong mantalaan.</p>	<h2 style="text-decoration: underline;">Unod</h2> <p>Editorial: Isalikway ang mini nga kalinaw, magpursige sa dalan sa gubat sa katawhan 1 2 ka pulis, giambus sa BHB-Mindoro 3 Pagpanghasi sa mga komunidad, nagpadayon 3 Mga protesta 3 Dose-dosenang "EDCA site" 4 Mag-uuma sa Hacienda Chiquita, mapalayas 5 Pagbatok sa magun-ubong <i>dredging</i> 6 Sa mubong pagkasulti 7 Kadaut sa mga proyektong <i>renewable energy</i> 8 Pagsukol sa paantus ug papet nga estado sa Kenya 9 Pagdungog sa kaso ni Duterte sa ICC, gilangan 10 ₱20 presyo sa bag-ong aning humay, giduso 10 Semana sa Paghandum sa mga martir sa India 10</p>
<p>Ang Ang Bayan ginamantala duha ka hugna matag bulan sa Komite Sentral sa Partido Komunista ng Pilipinas</p>	
 ang.bayan@cpp.ph	

2 ka pulis, giambus sa BHB-Mindoro

NAPATAY SA USA ka ambus sa Bagong Hukbong Bayan (BHB)-Mindoro (Lucio de Guzman Command) ang duha ka pulis samtang nagabyahe sa Barangay Bagong Silang, Victoria, Oriental Mindoro niadtong Hulyo 13 sa hapon. Matud sa hukbong bayan, tubag kini sa pangayo sa mga Mindoreño nga panubagon ang AFP-PNP sa teroristang kampanya niini sa mga lungsod sa Central Oriental Mindoro.

Ang presensyang militar ug pulis sa lungsod sa Victoria kabahin sa paghatag seguridad sa dagkung magun-ubon ug kontra-katawhan nga proyekto. Lakip dinhi ang pito ka lugar sa pagkwari sa Victoria nga gitugutan sa lokal nga gubyrno. Plano usab ang pagsulod sa dagkung operasyong mina sa Victoria gikan sa pagbuhì sa Mineral Production Sharing Agreement sa Mindoro Nickel Project.

Pagadauton niini ang liboan ka ektaryang kayutaan diin nakasandig ang panginabuhì sa mga mag-uuma ug Mangyan. Sagad nang ginahimo sa pulis ug militar ang pagpwesto ayha mag-sugod ang mga magun-ubong proyekto aron pugngan ang pagpanalipud sa katawhan sa ilang yuta ug kinaiyanhong bahandi.

Pagpanghasi sa mga komunidad sa mag-uuma, nagpadayon

PADAYON ANG PAGPANGHASI sa militar ug pulis sa mga komunidad sa mag-uuma sa Cavite, Masbate ug Negros Occidental.

Sa Masbate, giaresto ug gipasakahan og kasong rebelyon ang upat ka sibilyan. Gidakop niadtong Hunyo 25 sa Barangay Baras, Esperanza silang Ronnie Ursal, Manlik Espinosa ug Melicio Malaras, ug niadtong Hunyo 11 si Vicente Colomna. Gawas kang Colomna, nakagawas na ang tulo. Gipailalum usa sa *de facto* nga balaod militar ang siyam ka barangay sa lungsod sa Palanas ug Dimasalang sukad Hulyo 11.

Sa Himamaylan City sa Negros Occidental, gihulga sa mga ahenteng traydor nga "surenderi" nga patyon ang magtiayong Jolibert ug Rica Basilio kung dili sila mosurender ug makigtinabangay sa 94th IB. Nahitabo ang pagpanghulga niadtong Hulyo 9 dihang giadtuan sa mga sundalo ang magtiayon sa ilang balay sa Sityo Cabagal, Barangay Buenavista. Nagbunga ang insidente og kahadlok dili lamang sa magtiayon kundili sa tibuo komunidad.

Sa Cavite, planong kampuhan sa 2nd Civil Military Operation(CMO) Company ug Task Force Ugnay ang komunidad sa Tartaria sa Silang, Cavite aron pig-oton ang makanunayong pagsukol sa mga mag-uuma ug residente ug palayason sila sa lugar.

Samtang gipig-ot sa Bureau of Corrections (BuCor) ang tigpamaba sa grupong Kapatid nga si Fides Lim human niyang girklamo ang mga iligal ug dili makitawhanong palisiya sa ahen-sya. Gibawalan siyang makasulod sa tanang prisohan nga anaa ilalum sa hurisdiksyon sa BuCor. Aktibo si Lim sa pagpangalap ug paghatod og makitawhanong ayuda ug nakigbisog para sa mga katungod sa mga bilanggong pulitikal taliwala sa natahong pagpasagad ug abuso sulod sa New Bilibid Prison ug uban pang prisohan.



Mga kababayan-an, nagprotesta batok sa nagkagrabeng kagutom. Bitbit ang mga kaldero ug kalderin, gimakmak sa mga myembro sa Gabriela, Gabriela Women' Party ug Amihan ang Department of Agriculture niadtong Hulyo 7 tungod sa nagkagrabeng kagutom nga nasinati sa katawhan. Gihisgutan nila ang bag-o lang nga sarbey sa Social Weather Stations, nga nagsulting usa sa matag lima ka pamilyang Pilipino, o 27.2% ang nakasinati og "involuntary hunger" o kagutom tungod sa kalisud, kabangis o pag-usab sa palibot.

Mga mamumuong pangpubliko alang sa dugang sweldo ug kasigurohan sa trabaho. Nagtigum ang mga empleyado, magtutudlo ug mamumuo sa panglawas sa pangpublikong sektor sa usa ka protesta niadtong Hulyo 11 sa Quezon City para ipanawagan sa rehimeng Marcos ang dugang sweldo ug kasigurohan sa trabaho. Gilunsad nila ang protesta pipila ka semana ayha ang ika-4 nga State of the Nation Address ni Ferdinand Marcos isip pagduso sa dugay na nilang pangayo. Nag-una nilang panawagan ang pagtubag sa estado sa nagkaubos nga kalidad sa kinabuhì sa mga empleyado atubangan sa nagkataas nga implasyon.

Pagtukod sa Ahunan Dam, subling gibabagan sa mga Lagunense. Kapin usa ka libong residente sa Pakil, Laguna, uban ang mga organisasyon sa tawong-simbahan, kabatan-onan, mag-uuma, mangingisda, ug mga tigpanalipud sa kinaiyahan, ang nagmartsa niadtong Hulyo 5 aron ipadayag ang ilang grabeng pagsupak sa ginatukod nga Ahunan Dam. Gikan sa Saint Peter of Alcantara Parish Church, nagmartsa ang mga raliyista padulong sa upisina sa Ahunan Power Inc., kung asa gibasa ang pamahayag sa pakighiusa ug gipadayad ang kasuko sa katawhan.

Bag-ong CBA, napadaug sa Fuji Electric Philippines. Sa padayon nga pagpanghingu-sog, nakab-ot sa Lakas ng Nagkakaisang Manggagawa sa Fuji Electric Philippines Inc. (LNMFEF-OLALIA-KMU) ang dugang suhulan ug uban pang mga benepisyo para sa bag-ong collective bargaining agreement. Tinuig silang makadawat og dugang ₱50 sulod sa tulo ka tuig, makadawat og alawans sa pagkaon, bugas ug uban pa. Ang kumpanya pabrika sa semikonduktor nga nakabase sa Laguna.

Dose-dosenang “EDCA site” ug planong mga pabrika sa militar

Gipasasang pag-andam sa US sa Pilipinas isip base sa imperyalistang gubat

Sa milabayng duha ka tuig, subsub ang pagpalapad sa US sa presensyang militar ug pagtukod og mga estratehikong imprastrukturang militar niini sa Pilipinas. Niadtong 2024, gipwesto niini ang Typhon Missile Sytem sa amihanang Luzon. Giusundan kini karong tuiga sa pagsulod sa NMESIS, MADIS ug uban pang mga himang iggugubat.

Niining tuiga usab, giangkong sa US ang pasilidad nabal sa Oyster Bay sa Palawan, gimando ang pagtukod sa pabrika sa bala sa Subic ug gipagawas ang inisyal nga pondo alang sa konstruksyon sa Subic-Clark-Manila-Batangas Railway. (*Lantawa ang kalambigit nga artikulo sa AB, Hulyo 7, 2025.*) Kabahin kining tanan sa pag-andam sa US sa nasud isip usa ka dakung *forward operating base* sa ginahulhog niining imperyalistang gubat batok sa China.

Tin-aw nga sobra-sobra na sa siyam nga “nahiusahang EDCA site” (Enhanced Defense Cooperation Agreement) ang giangkong ug gigamit sa US nga mga base sa Pilipinas. Sa takuban sa walay puas nga mga *war games*, gipasasan sa US ang konstruksyon sa mga baraks, bodega ug iba pang imprastruktura sulod sa mga kampo sa Armed Forces of the Philippines (AFP) aron mahimong iakumudar ang nagkadaghang mga tropa, gamit ug sakyanang Amerikano nga tibuok tuig nga gibutang sulod ug palibot sa nasud.

Niadtong Hunyo, giaprubahan sa Kongreso sa US ang \$1-\$5 bilyong pondo alang sa “upgrade” sa dungguanang nabal sa AFP sa Oyster Bay. Ginagamit na sa US ang dungguanang alang sa mga “freedom of navigation operation” ug “joint patrol” sa South China Sea, kauban ang Australia ug Japan. Gikan pa 2020 gitransporma sa US ang malinawong komunidad sa mga mangingisda dinhi ngadto sa usa ka yaweng pasilidad alang sa mga barko ug *drone* pangdagat nga ginagamit niini aron hagiton ang mga barkong Chinese ug pagrabehehon ang tensyon

sa South China Sea. Ginalusot sa AFP ug US ang mga patrulya isip “pagpanalipud sa mga mangingisda Pilipino,” apan sa aktwal, ang US ug higanteng mga barko niini ang naghikaw sa ilang panginabuhian sa Oyster Bay ug kasikbit na kadagatan.

Kadungan niini, nabalita niining Hulyo ang pagtuod sa US og usa pa ka baseng nabal sa kadagatan sa Palawan, atubangan sa munisipalidad sa Quezon. Matud sa mga taho, napili ang lokasyon tungod sa kaduul niini sa Second Thomas Shoal, usa sa hinungdan sa kagubot sa dagat tali sa Pilipinas ug China. Ibutang dinhi ang mga “inflatable boat” nga ginagamit sa pag-atake ug pangdugang sa ginagamit na sa militar sa Pilipinas sa pakiglantugi niini sa mga barko sa China. Target sa US nga paganahon ang base sa unang kwarto sa 2026.

Niining tuiga usab, gisugdan na sa US ang plano niining gamiton ang Pilipinas isip dakung han-okanan og himang iggugubat. Subay kini sa 2025 Joint Vision Statement on Defense Industrial Cooperation nga gipirmahan sa rehimeng Marcos ug gubyerno ni Donald Trump niadtong Marso. Pamaagi kini sa US aron masiguro ang pinaspas ug walay putol nga suplay sa gamit iggugubat panahon nga moulbo ang inter-imperyalistang gubat.

Sa takuban sa “kolaborasyon” ug “pagpalambo sa kapasidad sa



depensa sa AFP,” pagatukuron sa US sa lain-laing dapit sa nasud ang mga pabrika niini sa bala, *unmanned systems (drone)*, pasilidad aron magproseso og mga “kritikal nga mineral” nga ginagamit sa mga bomba, ug “additive manufacturing” sama sa *3D printing*.

Niadtong Mayo, gipwesto na sa US sa Fort Magsaysay sa Tarlac ang usa ka *3D printer* nga adunay kapasidad nga maghimo og gagmayng *drone* (gitawag nga *first-person view* o *FPV drone*) nga haum sa terren ug klima sa Pilipinas. Gigamit ang maong mga *drone* sa gilunsad nga Salaknib Exercises Phase 2 aron “bahaon og mata” ang kalasangan ug mga baryo sa Northern Luzon. Kalabot sa maong aktibidad ang 7th IB ug 5th IB sa AFP. Ayha pa niini, giabli na sa AFP ug rehimeng Marcos ang Aurora alang sa pagmanupaktura sa US og mga *drone* niadtong 2024.

Ang mga pabrika, makina ug gamit iggugubat nga ibutang sa Pilipinas direktang padaganon sa militar ug mga gaway sa mga kapitalista sa industriyang militar sa US. AB

Pagpalayas sa mga mag-uuma sa Hacienda Chiquita sa Negros Occidental

Nahulgang mapalayas ang mga mag-uuma sa 21 ektarya ug 79 ektaryang yuta nga ilang ginaugmad sa Hacienda Chiquita sa E.B. Magalona, Negros Occidental. Gikatakdang iapud-apud ang yuta ilalum sa bogus nga Comprehensive Agrarian Reform Program Extension with Reforms (CARPER), pero subling ginailog karon ang yuta gikan kanila.

Nanimuyo ug nag-ugmad ang mga pamilya sa mga mag-uuma ug residente sa Hacienda Chiquita nga langkub sa Barangay Tuburan ug Barangay Poblacion 1 sukad pa niadtong 1952. Maapektuhan sa pagpangilog sa yuta ang kapin 120 ka mamumuong-panguma ug posibleng magpalayas sa 300 ka bubong o 1,500 ka indibidwal.

Niadtong 2012, giawhag sa Department of Agrarian Reform (DAR) ang mga mag-uuma nga magsumite og aplikasyon aron malangkub sa CARPER ang 21 ka ektaryang yuta. Gisumite nila ang ilang mga dokumento sa tabang sa National Federation of Sugar Workers (NFSW). Upisyal nga napatituluhan ang yuta niadtong 2019.

Nalangan ang pagpwesto sa yuta tungod sa pagbabag sa mga agalong yutaan ug kahinay sa pagproseso sa mga dokumento ug papeles niadtong panahon sa pandemyang Covid-19. Gawas niini, gitarget sa pagpatay ug pagpamigot sa kanhing rehimeng Duterte ang mga lider-mag-uuma ug grupong

nagatabang sa mga apektadong mag-uuma.

Imbes nga ituloy, gikansela sa DAR ang giapud-apud na nga Certificate of Land Ownership Award (CLOA) niadtong 2022. Gipahibalo lamang kini sa mga mag-uuma niadtong 2023. Giapela sa mga mag-uuma ang pagbawi sa misunod nga tuig.

Samtang ginaproseso ang apela, nagsugod ang konstruksyon sa usa ka kalsada niadtong Disyembre 2024 nga mihagip sa upat ka ektarya sa 21 ektaryang yuta.

Nabalaka ang mga mag-uuma nga kabahin kini sa pagdeklara sa kumbersyon sa yuta nga kasagarang taktika aron wad-ag kapuslanan ang mga CLOA ug distribusyon. Gikataho usab nga ginaadam ang yuta aron mahimong sentro sa komersyo.

Samtang, ang kasikbit niining 79 ka ektaryang yuta gikabalak-an usab nga ilugon. Tungod gamay na lamang ang pondo alang sa CARPER ilalum sa rehimeng Duterte ug Marcos, nahimong hinay ang dagan sa mga kaso ug petisyon kalabot dinhi. Sa kasamtangan, gitakda ang yuta para sa reklasipikasyon. Plano kining igahin sa usa ka proyektong pabalay alang sa mga napalayas sa mga proyekto sa mga baybay sa kasikbit nga mga barangay.

Niadtong Hulyo 9, nagprotesta


ang mga mag-uuma sa palengke sa E.B. Magalona, duul sa upisina sa DAR, aron iduso ang ilang katungod sa yuta.

Mini nga reporma sa yuta ilalum ni Marcos

Ilalum sa rehimeng Marcos, wala bag-ong yuta ang gilangkub sa reporma ug pag-apud-apud. Sa giapud-apud sa DAR nga 195,000 CLOA gikan Hulyo 2022 hangtud Enero 2025, 68% o 132,000 niini gikan na sa kanhi nang gunit sa mga mag-uuma nga kolektibong CLOA nga gibahin-bahin ilalum sa programang SPLIT sa World Bank. Instrumento ang SPLIT aron bahin-bahinon ang pagpanag-iya sa dagkung parsela sa yuta ug ibutang kini sa *market valuation* (pagtakda sa bili) alang sa pagbuhis, pagbaligya ug kumbersyon.

Ilalum sa New Agrarian Emancipation Act (NAEA), ginapagawas ni Marcos nga “abswelto” ang wala nabayarang amortisasyon sa mga benepisyaryo sa CARP. Gani, mumho lamang sa karaang mga utang ang giabswelto niini ug dili lakip ang bag-ong utang sa mga benepisyaryo. Anaa sa 14% lamang sa target sa benepisyaryo ug 6% sa mga mag-uuma ang nalangkub dinhi. Ingonman, wala gipapha sa NAEA ang dakung kumpensasyon nga gitanyag sa CARP sa mga agalong yutaan, ug gipasa lamang sa katawhan ang pagbayad dinhi. Karong tuiga, gimando sa Court of Appeals ang pagbayad sa estado sa makapahibulong nga ₱28 bilyon sa pamilyang Aquino-Cojuangco alang sa Hacienda Luisita.

Sa lintunganay, ang SPLIT ug NAEA dugang lamang sa taas nang listahan sa mga pamaagi aron ilugon ug monopolyhon ang yuta sa mga agalong yutaan ug asendero, mga plantasyon ug dagkung langyawng kumpanya sa agribisnes, *real estate* ug uban pa.



Panaghiusa batok sa magun-ubong operasyong *dredging* sa Ilocos Sur

Mibarog ang mga residente sa Ilocos Sur batok sa magun-ubong operasyong *dredging* sa Isla Verde Mining and Development Company (IVMDC) sa bukana sa Abra River ug sa parte sa West Philippine Sea nga langkub sa prubinsya. Dungan-dungan silang naglawig sa usa ka *fluvial protest* niadtong Hulyo 16 aron iduso ang pagpahunong sa operasyon nga matud nila nagadaut sa kinaiyahan ug ilang panginabuhian. Nangalap usab sila og pirma alang sa usa ka petisyon batok sa *dredging*.

Gisugdan ang *dredging* niadtong Mayo 2024 sa takuban sa pagpugong sa pagbaha sa Vigan City, Caoayan ug Santa. Gisugdan ang operasyon pinaagi sa kasabutan tali sa IVMDC ug sa Department of Environment and Natural Resources (DENR) sa rehiyon niadtong Hunyo 2022. Gihatagan og permit ang operasyon sa Department of Public Works and Highways ug Mines and Geosciences Bureau.

Hangtud niadtong Disyembre 2024, nakakalot na ang kumpanya og kapin walo ka milyong kubiko metro sa materyal mula sa Banaoang River nga parte sa Abra River. Gidala kini sa Pasay City aron gamiton sa usa ka proyektong reklamasyon.

Nagkahagbang panginabuhian

Sa sinugdanan pa lang sa *dredging* o pagkubkub, gireklamo na sa mga residente sa 12 ka barangay sa mga lungsod sa Santa ug Caoayan ang kabanha, mas grabeng pagdahili sa balas sa baybay, ug nagkagamay nga sikop sa isda. Sa kapin usa ka tuig, miubos ang nasikop nga isda sa lugar tungod kay nangaabog ang mga isda sa kusog nga hugong sa dagkung mga barko.

Kung kaniadto nakabaligya sila og ₱1,000 balor sa isda, karon dili na paigo ang ilang abot bisan pangkonsumo lang. Gireklamo usab sa mga mangingisda ang baho ug lasang gasolina nga mga isdang nasikop

duul sa baybay.

Natukmod ang pipila ka mangingisda nga molayag og hangtud 30 milya gikan sa baybay aron lamang makasikop og ubay-ubay nga isda. Tungod niini, nadugangan ang gasto sa krudo gikan sa kanhing ₱500 kada adlaw ngadto sa ₱1,000 hangtud ₱3,000 kada adlaw.

Miubos usab ang nakuhang ipon (*goby fry*). Gikan sa kanhing 100 lata (17 litro kada usa) nga ilang nasikop, anaa sa 30 lata na lamang ang ilang gakapuno sa kasamtangan. Sa pag-ubos sa suplay, misaka usab ang presyo niini sa merkado.

Gilunop nga mga komunidad

Imbes nga masulbad ang isyu sa pagbaha, nabalaka na hinuon karon ang mga residente sa pagbaha tungod sa mas paspas nga pagdahili sa mga balas tungod sa *dredging*. Gipagrabe niini ang posibilidad sa

pagbaha ilabina sa Barangay Damay, ug sa mga isla-barangay sa Oribi ug Puro. Doble ang ilang kabalaka ilabina nga ting-baygo na.

Gibutyag ni Dr. Fernando Siringan, eksperto sa *marine* ug *coastal geology*, nga sayop ang lugar sa operasyon sa *dredging*. Matud niya, adunay mga bahin sa Banaoang River nga angayang kaluton apan dili ang erya kung asa ginahimo ang *dredging*.

Matud niya, magresulta lamang ang kasamtangan operasyon sa pagkaguba sa dili lig-ong bukana sa suba ug motipun-og sa mga lawog gikan sa mga baybay-dagat padulong sa mga kinalutan sa *dredging*. Nagresulta kini sa pagsulod sa dagat sa daghang barangay. Labaw lamang niining gipagrabe ang problema sa pagbaha imbes nga sulbaron kini.

Dugang pa sa eksperto, sayop usab ang ginahimong pagdala sa kinalot nga balas ug graba sa Pasay City. Hinunua, angayan lamang kunong ibalhin ang kinalot nga mga materyal sa laing bahin sa suba.

Reklamo sa mga residente, walay unsamang pangpublikong konsultasyon nga gihimo ayha ang *dredging*. Aduna lamay porum sa Barangay Rancho sa Santa niadtong Nobyembre 2024 dihang anaa na sa tungatunga ang proyekto.

Atubangan niini, panawagan sa mga residente sa pagpanguna sa Defend Ilocos Sur nga ihunong ang *dredging* sa labing daling panahon, hatagag kumpensasyon ang mga nawad-an og panginabuhian, ipubliko ang mga dokumento ug siyentipikong pagtuon dinhi, ug panubagon ang kumpanya sa paggun-ub og dautang epekto sa *dredging* sa komunidad. AB



MGA PAGLAPAS

SA TAWHANONG KATUNGOD

(DISYEMBRE 10, 2024 – HUNYO 30, 2025)

180,074

IHAP SA BIKTIMA

239

IHAP SA KASO

24

PAGPATAY

10

PAGPANAKIT

17

PAGDAGIT

7

PAKYAS NGA
PAGPATAY

19

PAGPAMUGOS

23

TORTYUR

2,060


PUGOSNGA
PAGBAKWIT
UG DISLOKASYON

73

PAG-ARESTO
UG DETENSYON

891

PAGPANGHULGA, PAGPAMIG-OT,
INTIMIDASYON



₱2.4 BILYON

kaso sa korapsyon ang gipasaka batok kang **Leonor Briones**, kanhing kalihim sa DepEd, ug uban pang opisyal sa departamento kalabot sa pagpalit niadtong 2021 og gisobraan pagpresyo nga mga *laptop* alang sa mga magtutudlo.

20% TARIPA

ang ipahamtang sa US sa mga eksport sa Pilipinas (gawas sa *semiconductor*, *aluminum* ug *wiring*) gikan sa kanhing 17%. Ginagamit ni **US President Trump** ang mga taripa isip pangpig-ot sa mga nasud aron mouyon sa iyang mga dikta.



130

ka mga mamumuo ang nataho nga namatay gikan Enero hangtud Hunyo karong tuiga tungod sa lain-laing insidente nga adunay kalambigitan sa seguridad sa lugar sa trabaho.

Gikan sa: *Institute for Occupational Health and Safety Development*

₱154.51 BILYON

ang kita sa estado gikan sa *online* nga sugal niadtong 2024, tulo ka beses nga mas daku kaysa miaging tuig. Midaku og 465% ang kinatibuk-ang kita niini sa ikatulong kwarto sa 2024 kumpara sa 2023.

39%

sa mga Pilipino ang gasugal *online*, lakip ang pinakapobre ug mga menor-de edad. **Na-adik sa sugal ang daghan kanila.**



₱100/kilo ↓

paghagba sa presyo sa **tawilis** gikan sa kanhing ₱250/kilo tungod sa kahadlok sa mga konsumer sa giingong pagkadiskubre sa mga patayng lawas sa mga "nawala nga sabungero" sa Taal Lake.



112.73 MILYON

populasyon sa Pilipinas nga narekord niadtong Hulyo 1, 2024; 3.69 milyon mas daghan kumpara sa 2020. Ang 5-ka-tuig nga tantos sa pagdaku nga 0.8% mas hinay kumpara sa 1.63% nga pagdaku sa panahong 2015-2020.

Gikan sa: *Philippine Statistics Authority*

Mga proyektong *renewable energy*, ganansya sa mga negosyante, kadaut sa katawhan

Sa una niyang State of the Nation Address, gisulti ni Marcos nga ang *renewable energy* (RE) pagatagdon sa iyang gubyerno isip yaweng sektor aron kuno sa pagpalambo sa ekonomiya sa nasud. Gikan kaniadto, nahimong agresibo ug dayag ang pagpangilog og yuta ug pagguba sa kinaiyahan aron hatagag dalan ang mga tigpamuhunan sa RE sa nasud. Mokabat sa 68% sa langyawng pamuhunan niadtong 2024 gikan sa mga proyektong RE.

Ilalum sa National Renewable Energy Program (NREP), ang gitarget nga 50% sa enerhiya sa Pilipinas pagka-2040 maggikan sa RE. Gitukod kini sa tinguhang aduna kunoy “sustenableng tinubdan” sa enerhiya. Ang RE naglangkub sa enerhiyang *biomass* (dunot nga organikong materyal), *solar* (adlaw), *wind* (hangin), *geothermal* (init nga sungaw gikan sa yuta) ug *hydropower* (tubig).

Labaw nga gidalian ug gipasasan ni Marcos ang paghatag og permit ug lisensya sa mga langyawng kapitalistang tigpamuhunan sa RE. Niadtong Abril, naghatag ang Department of Energy og permit alang sa 1,319 nga proyektong RE, 39% o 517 dinhi mga proyektong solar. Ang Ilocos ang ika-upat sa adunay pinakadaghang proyektong *solar*, nga adunay 53 proyekto. Target usab sa estado nga adunay 46,000 ektaryang *solar farms* pagka-2040.

Paspas usab nga gidawat sa mga lokal nga dagkung burgesyang kumprador ang mga proyektong RE sa nasud aron pahimuslan kini. Lakip dinhi ang Solar Philippines New Energy Corp. (SPNEC) ni Manny Pangilinan, AC Energy Corp. (ACEN) sa mga Ayala, APC Group Inc./ Philippine Geothermal Production Co. sa pamilyang Sy, Astra Solar Energy Corp. sa kumpanyang Aboitiz, San Miguel Global Power Holdings ni Ramon Ang ug Energy Development Corporation (EDC) sa Lopez Group.

Usa sa labing magun-

ubong proyektong RE mao ang 3,500 ektaryang *solar farm* (mas daku pa sa tibuok Makati City ug Mandaluyong) nga gipanag-iyahan sa Meralco Terra Solar sa parte sa Bulacan ug Nueva Ecija. Kini mamahimong pinakadaku nga *solar* ug *battery facility* sa tibuok kalibutan. Gipanag-iyahan kini sa SPNEC ug Actis, kumpanyang nakabase sa United Kingdom (UK).

Pagalangkubon usab sa Laguna Lake Floating Solar Project ang 2,000 ektarya sa danaw sa bahin sa Calamba, Santa Rosa, Cabuyao, Bay ug Victoria. Gipanag-iyahan kini sa ACEN ug mga kumpanya gian Singapore ug UK.


Lakip sa pinakadakung *offshore* ug *onshore windfarm* pagatukuron sa San Miguel Bay, Camarines Sur, nga molangkob sa 23,307 ektaryang katubigang pangmunisipyo sa San Miguel. Kini adunay kapasidad nga 1,000 megawatts (MW) ug iya sa

Copenhagen Infrastructure New Market Fund Corp., kumpanyang gikan Denmark ug ACEN nga adunay 25% nga sosyo. Pagatukuron usab ang 1,200 MW Guimaras Strait OSWF sa tunga-tunga sa Panay ug Negros nga iya sa mga kumpanya gikan Switzerland ug Liechtenstein. Pagatukuron usab sa ACEN ang 2,510 MW Quezon North Wind Farm sa Real, Quezon ug ang 625 ektaryang North Luzon Renewable Wind Farm sa Pagupud, Ilocos Norte.

Mokabat sa 99 ka proyektong *hydropower*, nga adunay kinatibukang 4,000 MW, ang giaprubahan sa gubyerno sa Cordillera. Upat dinhi ang iya sa kumpanya gikan Australia. Nakatakda usab nga magtukod og tulo ka *geothermal power plant* (GPP) sa rehiyon nga magmugna og kinatibukang 300 MW nga kuryente. Kini ang Buguias-Tinoc GPP nga iya sa EDC, ug Kalinga GPP ug ang Mainit-Sadanga GPP nga parehong iya sa APC.

Rason sa reaksyunaryong estado ang “pag-atubang sa krisis sa klima” aron ilusot ang binilyong kantidad sa proyektong RE. Apan ang tinuod, gipahuyang ang kapasidad sa nasud nga atubangon ang mga unos sa pag-usab sa klima sa walay puas nga pagguba sa kinaiyahan aron hatagag dalan ang maong mga pasilidad.

Mas grabe, libu-libong mag-uuma, mangingisda ug lumad ang mangawad-ag panginabuhian ug puluy-anan ug libu-libong ektaryang yutang agrikultural, kadagatan ug kalasangan ang gub-on sa ngalan sa limpyung enerhiya nga monopolisado sa langyaw ug lokal nga burgesyang kumprador.



Kasilag ug pagsukol sa katawhan sa paantus ug papet nga estado sa Kenya

Subling miulbo sa Kenya niadtong Hunyo ang kasuko ug protesta batok sa anti-katawhang palisiya sa buhis ug pagpakaitoy sa gubyerno dinhi. Niadtong Hunyo 25, liboan ka Kenyan ang mipanon sa mga kalsada sa Nairobi, Mombasa, Kisii ug uban pang syudad aron dumumon ang mga protesta niadtong miaging tuig. Dili moubos sa 16 ang napatay ug kapin 400 ang nasmdan dihang bangis nga gibungkag sa mga pulis ang mga protesta.

Niadtong Hulyo 7, 38 ka raliyista ang napatay samtang 107 ang nasmdan ug kapin 500 ang giaresto dihang gibungkag sa mga pulis ang mga demonstrasyon nga nagdumdom sa ika-35 nga anibersaryo sa “Saba Saba” o “pito pito” sa pinulungang Kishwahili. Sa maong adlaw niadtong 1990 gilunsad ang higanteng rali nga nagtukmod sa kanhi presidente sa Kenya nga usabon ang sistema sa panggamhanan. Gigamit sa katawhan ang okasyon aron iduso ang pagpalagpot sa kasamtangang presidente sa nasud nga si William Ruto.

Misubsub ang mga protesta niadtong 2024 batok sa Finance Bill, usa ka balaodnon nga magpahamtang og tag-as nga buhis sa batakang mga palaliton ug serbisyo, motangtang sa mga subsidyo, ug magkibhang sa badyet alang sa mga katilingbanong serbisyo.

Dikta sa International Monetary Fund ang balaodnon isip kundisyon sa pagpautang. Laraw niining padakuon ang kita sa estado aron siguruhong makabayad kini sa utang, nga mikabat sa \$76.6 bilyon niadtong Abril, katugbang sa 75% sa *gross domestic product* (GDP) sa Kenya. Napaatras ang balaodnon niadtong milabayng tuig apan wala hingpit nga gibasura. Hinunua, gitagodtagod ug minaro nga gilusot ni Ruto sa parlamento ang mga parte niini.

Alang sa daghang Kenyan, girepresentahan sa Finance Bill ang neokolonyal ug neoliberal nga laraw sa rehimeng Ruto. Sigurado sila nga abagahon sa mga mamumuo ug kabus nga sektor sa katilingbang Ken-

yan ang bug-at nga buhis. Sayod silang dili kini makaya sa ordinaryong katawhan nga nag-ilaid sa kalisud, walay pormal nga trabaho ug nagatubang sa kanhi nang tag-as nga presyo sa mga palaliton ug serbisyo. Gikasuko nila ang pagsunud-sunod ni Ruto sa mga dikta sa imperyalistang institusyon.

Milapad ang mga protesta ngadto sa kalihukan alang sa pagpalagpot kang Ruto human ang serye sa bangis nga dispersal, dinaghang pagpang-aresto, nagkadaghang kaso sa pagdagit ug pugos nga pagkawala sa mga lider-protesta, ug mga pagpatay.

Dungan sa grabeng krisis sa ekonomiya ang krisis sa pulitika sa nagharing hut-ong. Aktibong ginahagit ang gahum ni Ruto sa kanhing *deputy president* sa nasud nga si Rigathi Gachagua. Na-*impeach* si Gachagua niadtong 2024 sa mga kasong paglapas sa konstitusyon, pagpaniak base sa etnisidad, ug

pagpahuyang sa awtoridad sa gubyerno.

Kahimtang sa katilingban ug katawhang Kenyan

Atrasado ug agraryo ang katilingbang Kenyan. Nakasandig ang agrikultura niini sa ginagmay ug bulag-bulag nga produksyon. Gilangkuban niini ang hangtud 37% sa GDP ug 40% sa kinatibuk-ang empleyo. Limitado ang industriya, ug gamay ang bahin sa pagmanupaktura sa GDP (8%).

Sa miaging mga tuig, nakasinati ang nasud og grabeng krisis sa empleyo. Niadtong 2022, mikabat sa 13.9% ang tantos sa disempleyo, pinakagrabe sa han-ay sa kabatan-onan. Gibana-banang 67% sa kabatan-onang Kenyan, edad 15 hangtud 34, ang walay trabaho.

Samtang, anaa sa impormal nga sektor ang 80% sa mga trabaho o kapin 17 milyon sa kinatibuk-ang 20 milyon. Niadtong 2024, 90% sa bagong namugna nga trabaho mga impormal, mayorya sa ginagmayng retail ug pagmanupaktura.

Nakalansang ang suhulan sa mamumuong Kenyan sa \$177/bulan (₱6,680) samtang ginasulting anaa sa \$138 (₱7,880) sa kabanikanhan ug \$299 (₱17,000) sa kasyudaran ang makabuhi nga suhulan alang sa 5 ka tawong nga pamilya.

Gawas sa mga syudad, nagatubang ang mag-uumang Kenyan sa kawalay lupa, gagmayng umahan, atrasadong produksyon, walay panag-angay-angay sa pagpanag-iyang sa yuta tali sa kababayan-an ug kalalaken-an, ug malukpanong kalisud. Anaa sa 50% sa yuta sa nasud ang ginaila nga agrikultural apan 20% lamang dinhi ang haum sa pag-uma. Ang 20-30% pa niini ginatamnan og pang-eksport nga mga pananum sama sa tsa, kape ug bulak.



Pagdungog sa kaso sa ICC, ginapalangan sa kampong Duterte

Sunud-sunod nga petisyon ang gisumite sa kampo ni kanhing presidente Rodrigo Duterte aron langanon ang pagdungog sa iyang kasong krimen batok sa katawhan sa Pre-Trial Chamber 1 sa International Criminal Court (ICC). Pinakabag-o dinhi ang petisyon alang sa “hinanaling status conference” nga gipasaka niadtong Hunyo 17 aron kwestyunon ang iskedyul sa pag-atubang ni Duterte sa korte sa Setyembre 23. Gigamit pa niining hinungdan ang mga “delay” o pagkalangan kuno sa mga pagpangandam sa prosekusyon.

Ayha niini, gibasura na sa korte ang uban pang mga “delaying tactic” sa mga abugado ni Duterte. Usa dinhi ang petisyon aron idiskwalipika ang duha ka huwes nga nagguni sa iyang kaso. Niadtong Hulyo 3, gibalibaran sa plenaryo sa ICC ang ilang hangyo nga tangtangan silang Judge María del Socorro Flores Liera ug Judge Reine Adélaïde Sophie Alapini-Gansou gikan sa Pre-Trial Chamber I.

Matud sa ICC, walay basehan ang alegasyon sa kampo ni Duterte nga adunay gidapigan ang mga huwes tungod sa nauna nilang kalambigitan sa desisyon kalabot sa isyu sa hurisdiksyon sa korte sa kaso. Gitin-aw sa ICC nga kabahin sa trabaho sa mga huwes ang subling paghisgot sa mga ligal nga isyu samtang nagalarga ang kaso, ug wala kini nagpasabot sa pagdapig o *bias*.

Duha pa ka petisyon nga pagpalangan sa proseso ang gisang-at sa mga abugado ni Duterte. Ang una mao ang hurisdiksyon sa korte kang Duterte tungod kay dili na myembro sa ICC ang Pilipinas ug ang ika-duha mao ang pagpangayo og *interim release* o temporaryong pagbuhi. Wala pay desisyon ang korte sa parehong petisyon. Sa kaso sa *interim release*, hugot kining gibabagan sa mga biktima, ug sa ilang mga abugado, ug bisan sa prosekusyon sa ICC.

Samtang, padayon ang paglarga sa kaso sa korte. Niadtong Hulyo 1, nagsumite ang prosekusyon sa ika-11 nga bungkos sa ebidensya batok sa kanhing presidente, lakip ang kapin 1,000 ka dokumento nga naglangkub sa mga pagpatay gikan sa panahon niya isip meyor sa Davao City hangtud sa iyang termino isip presidente. AB

₱20 presyo sa bag-ong ani nga humay, duso sa mga mag-uuma sa Nueva Ecija

NAGPASAKA OG PETISYON ang mga mag-uuma sa Barangay Bantud, San Roque ug uban pang barangay sa Guimba, Nueva Ecija aron himuong ₱20 kada kilo ang minimum nga pagpalit sa bag-ong ani nga humay karong bulan sa Hulyo. Matud nila, mikabat sa ₱14 kada kilo ang puhunan sa humay apan ginapalit lamang kini sa presyong ₱10-₱12. Atol sa anihan, adunay mga komersyanteng gipaubos pa ang presyo sa pagpalit ngadto sa ₱5/kilo.

Walay bularanan ug wala usay mga trak para madala sa mga mag-uuma sa National Food Authority ang ilang ani. Kulang sa pondo ang ahensya aron mahimong mapuslanon kanila. Tungod dinhi, napugos sila nga dawaton ang pagpahimulos sa mga komersyante.

Usa sa pinakadakung prodyuser sa bugas ang Nueva Ecija, ug ang Guimba sa partikular. Sa datos alang sa unang kwarto sa 2023, naka-ani dinhi og 345,547 metriko tonelada (MT) nga humay. Kini 39.8% sa kinatibuk-ang produksyon sa humay sa Central Luzon. Gilangkuban usab sa Central Luzon ang 18.1% sa nasudnong output sa humay.

Niadtong Hunyo, nagtukod ang NFA og ₱63.9 milyong Rice Processing System (RPS) II Facility sa Muñoz City. Kapin 19 kilometro ang gilay-on niini sa San Roque, ug kayang magserbisyo og hangtud 6,000 ka mag-uuma. Sa Guimba pa lang, adunay gibanabanang 7,500-15,000 ka mag-uuma.

Gawas sa ₱20 nga presyo sa pagpalit, gipangayo usab sa mga mag-uuma nga ibasura ang Rice Liberalization Law (RLL) o RA 11203 tungod kay ginaduso lamang niini ang guberno nga mosalig sa agrikultura sa ubang nasud para sa panginahanglan sa mga Pilipino.

Hugot nga ginasuportahan sa Kilusang Magbubukid ng Pilipinas (KMP) ang panawagan sa mga mag-uuma sa Guimba.

Matud niini, ginagamit sa mga komersyante ang pagbaha sa merkado sa imported nga bugas aron labaw pang paubsan ang presyo sa lokal nga humay. Niini nga kahimtang, nalugi ug labawng nalubong sa utang ang mga mag-uuma sa humay. Bugtong ang mga *trader* ug importer ang nakapahimulos.

Semana sa Paghandum sa mga martir sa India

NAGPADAYAG SA PAKIGHIUSA ang Partido Komunista ng Pilipinas (PKP) sa nakatakdang Semana sa Paghandum sa mga Martir nga ipahigayon sa Communist Party of India (Maoist) sa Hulyo 28 hangtud Agosto 3. Lakip sa parangalan niining semaha ang namartir nga kalihim sa CPI (Maoist) nga si Kasamang Basavaraju (Nambala Keshava Rao).

Matud sa PKP, ang mga bayani sa katawhang Indian bayani usab sa katawhang Pilipino tungod paghalad nila og kinabuhi sa pakigbisog alang sa nasudnon ug katilingbanong paglingkawas. Sa India man o Pilipinas, nagtuo ang PKP nga nagkadaghang mamumuo, mag-uuma ug uban pang dinaugdaug nga hut-ong ang mobaktas sa rebolusyonaryong dalan isip pagpadayon sa kawsa sa ilang mga martir.

Giawhag sa PKP ang tanang rebolusyonaryong pwersa sa Pilipinas nga makighiusa ug mosalmot sa Semana sa Paghandum.